

INSTRUCCIÓN Nº: 10/2026**DATA:** na data da sinatura electrónica**ÓRGANO EMISOR:**

Dirección Xeral de Loita contra a violencia de xénero (Consellería de Política Social e Igualdade)

Dirección Xeral de Formación e Cualificación para o Emprego (Consellería de Emprego, Comercio e Emigración)

DESTINATARIOS:

- Oficinas de emprego
- Servizos de Formación e Cualificación para o Emprego dos Departamentos Territoriais: Persoas coordinadoras de VVX
- Subdirección xeral do Servicio Público de Emprego de Galicia (Dirección Xeral de Formación e Cualificación para o Emprego)
- Entidades sen ánimo de lucro beneficiarias das subvencións destinadas ao fomento da contratación de mulleres que sofren violencia de xénero
- Unidades Administrativas de Igualdade das Direccións territoriais da Consellería de Política Social e Igualdade
- Subdirección xeral para o Tratamento da Violencia de Xénero (Dirección Xeral de Loita contra a violencia de Xénero)

ASUNTO:

Regular o procedemento de selección das traballadoras a contratar ao abeiro da Orde do 24 de xullo de 2026 pola que se establecen as bases reguladoras das subvencións destinadas ao fomento da contratación por parte de entidades sen ánimo de lucro de mulleres que sofren violencia de xénero, cofinanciadas pola Unión Europea no marco do Programa FSE+ Galicia 2021-2027, e se procede a súa convocatoria para o ano 2026 con carácter plurianual (código de procedemento SI461B).



INSTRUCCIÓN

O artigo 9 da Orde do 24 de xullo de 2026 pola que se establecen as bases reguladoras das subvencións destinadas ao fomento da contratación por parte de entidades sen ánimo de lucro de mulleres que sofren violencia de xénero, cofinanciadas pola Unión Europea no marco do Programa FSE+ Galicia 2021-2027, e se procede a súa convocatoria para o ano 2026 con carácter plurianual establece que para facilitar a selección de candidatas, a Consellería de Política Social e Igualdade e o Servizo Público de Emprego de Galicia elaborarán unha instrución conxunta que se fará pública na sede electrónica da Xunta de Galicia: <https://sede.xunta.gal/portada>.

O mesmo artigo 9 recolle que: *"Para a selección das candidatas, as entidades beneficiarias das subvencións previstas nesta orde poderán contactar coa oficina de emprego asignada para a presentación da correspondente oferta, e solicitarán a relación de candidatas segundo os requisitos de perfil profesional que determine a entidade e/ou cooperativa sen ánimo de lucro, tendo en conta que todas as candidatas deben posuír a condición de vítimas da violencia de xénero, mulleres vítimas de trata con fins de explotación sexual e/ou vítimas de explotación sexual. Poderán presentarse ofertas nominativas sempre que se cumpran os requisitos fixados nesta orde.*

Para a selección de candidatas, as entidades beneficiarias das subvencións poderán contactar cos Centros de Información á Muller, os centros da Rede Galega de Acollemento, o Centro de Recuperación Integral para Mulleres que sofren violencia de xénero, os servizos sociais e calquera outro servizo que traballe no eido da violencia de xénero, aos efectos de propoñer participantes para a súa contratación, sempre e cando estas reúnan os requisitos recollidos no artigo 6.

Así mesmo o artigo 11 establece que *"tanto no caso de extinción, como de substitución por suspensión do contrato, a selección da persoa substituta deberá levarse a cabo de acordo co disposto nos artigos 6 e 9 desta orde"*.

As mulleres finalmente seleccionadas serán identificadas polo Servizo Público de Emprego de Galicia e non poderán participar noutras medidas activas de emprego que se consideren incompatibles coa participación en programas de inserción laboral como o regulado nesta Orde.

Para os efectos de regular polo tanto o procedemento de selección, dítase a presente instrución.



1.- TRABALLADORAS A CONTRATAR

O artigo 6 da Orde do 24 de xullo de 2026 establece que “As persoas destinatarias finais das subvencións reguladas nesta orde serán as mulleres que sofren violencia de xénero, incluídas as mulleres que padeceran violencia vicaria, e as mulleres vítimas de trata con fins de explotación sexual e/ou vítimas de explotación sexual, inscritas como demandante de emprego, independentemente da súa situación laboral, no Servizo Público de Emprego de Galicia”, e aclara que *“para os efectos desta Orde, entenderase por mulleres en situación de violencia de xénero na Comunidade Autónoma de Galicia todas aquelas que tiveran cesado a relación de convivencia ou dominación co agresor, e que acrediten a situación de violencia.*

Polo tanto todas as mulleres das que se propoña a contratación deberán ser vítimas de violencia de xénero e reunir os seguintes requisitos:

- 1.- Estar inscritas como demandantes de emprego en situación laboral de desemprego ou ocupadas no Servizo Público de Emprego de Galicia.
- 2.- Ter cesado a relación de convivencia co agresor.
- 3.- Acreditar a situación de violencia a mediante algún dos documentos seguintes:
 - a) Certificación da orde de protección ou da medida cautelar, testemuño ou copia autenticada polo/a letrado/a da Administración de Xustiza da propia orde de protección ou da medida cautelar.
 - b) Sentenza de calquera orde xurisdiccional, que declare que a muller sufriu violencia de xénero ou documento xudicial que declare que a muller é vítima de trata de seres humanos con fins de explotación sexual e/ou vítima de explotación sexual.
 - c) Informe dos servizos sociais e/ou sanitarios da Administración pública autonómica ou local no que se recolla a dita condición de vítima de violencia de xénero.
 - d) Informe dos servizos de acollida da Administración pública autonómica ou local no que se recolla a dita condición de vítima de violencia de xénero.



e) Informe do Ministerio Fiscal que indique a existencia de indicios de violencia e/ou de trata con fins de explotación sexual e/ou explotación sexual, auto de apertura de xuízo oral ou documento equivalente no que conste a existencia dos ditos indicios.

f) Informe da Inspección de Traballo e da Seguridade Social.

g) Informe das Forzas e Corpos de Seguridade que indique a existencia de indicios claros de trata con fins de explotación sexual e/ou vítima de explotación sexual.

Para a dita acreditación da condición de vítima, recórdase a incorporación do novo modelo único (para todo o territorio estatal) de acreditación da condición de VVX, aos efectos dos dereitos laborais e prestacións da Seguridade Social regulados no Capítulo II do Título II da Lei Orgánica 1/2004 do 28 de decembro de medidas de protección integral fronte a violencia de xénero, e de conformidade co artigo 23 da Lei orgánica 1/2004 do 28 de decembro de medidas de protección integral fronte a violencia de xénero.

Debe lembrarse que o mesmo artigo 6 establece no último parágrafo do seu punto 2" en todo caso, a documentación acreditativa da situación de violencia de xénero debe estar emitida ou asinada no prazo dos 24 meses anteriores á data na que a Consellería notifique que as candidatas seleccionadas cumpren os requisitos desta orde segundo o sinalado no artigo 9.4.

Se as medidas contidas na sentenza ou na orden de protección están en vigor, non opera o devandito límite temporal.

2.- ENTIDADES BENEFICIARIAS DA SUBVENCIÓN

Segundo dispón o artigo 4 da Orde do 2 de abril de 2025, poderán ser beneficiarias das subvencións previstas nesta orde, e sempre que cumpran os requisitos nela esixidos:

a) as entidades sen ánimo de lucro

b) as cooperativas sen ánimo de lucro segundo o establecido na Disposición Adicional Cuarta da Lei 5/1998 do 18 de decembro, de cooperativas de Galicia, que acrediten o cumprimento das previsións da dita Lei respecto dos topes máximos de traballadores ou traballadoras por conta allea.

3.- PROCEDEMENTO PARA A SELECCIÓN



A partir do momento de comunicación da resolución de concesión por parte da Dirección Xeral de Loita contra a Violencia de Xénero, as entidades beneficiarias poderán iniciar o procedemento de selección das mulleres demandantes de emprego a contratar, segundo os apartados seguintes.

A. Comunicación das resolucións de concesión de subvención:

A Subdirección Xeral para o Tratamento da Violencia de Xénero da Dirección Xeral de Loita contra a Violencia de Xénero comunicará ao Servizo Público de Emprego, a través das coordinacións provinciais de VVX dos departamentos territoriais, así como ás Unidades Administrativas de Igualdade, a concesión de subvencións destinadas ao fomento da contratación de mulleres que sofren violencia de xénero por parte das entidades sen ánimo de lucro, identificando cada unha das que van levar a cabo a dita contratación e especificando o número de mulleres a contratar por cada entidade.

B. Coordinación do procedemento de selección e selección das mulleres candidatas:

Unha vez ditada resolución favorable, dende a Dirección Xeral de Loita contra a Violencia de Xénero indicaráselle ás entidades que deberán poñerse en contacto coordinadora provincial. Esta, de común acordo coa persoa/s directora-coordinadora das oficinas de emprego da súa provincia asignará a persoa titora de referencia na oficina de emprego que lle corresponda, preferentemente segundo o seu ámbito territorial, e para os efectos de coordinar e xestionar o proceso de selección das mulleres participantes: requisitos da oferta, supervisión de incidencias, etc.

As entidades poderán realizar a selección sen necesidade de realizar buscas no Servizo Público de Emprego (punto 3.1) ou ben acudir ao SPEG para realizar a busca das candidaturas (punto 3.2). Ambos procedementos son compatibles.

En ambos procedementos de selección e ao tratarse dun contrato de traballo temporal coas cláusulas de interese social ten que haber un número de oferta de emprego rexistrada no Servizo Público de Emprego de Galicia.

Todos os aspectos relacionados con estas ofertas de emprego (sondaxes, incorporación de candidatas, envío de candidatas, mecanización de resultados...etc) serán competencia exclusiva da ou das persoas titoras de VVX da oficina de emprego designada. A estes efectos, recomendamos que as sondaxes se realicen entrando con usuario e contrasinal, para detectar



as vítimas con datos protexidos e posteriormente se acceda co certificado dixital para poder realizar as xestións oportunas.

3.1 SELECCIÓN SEN REALIZAR SONDAXES NA OFICINA DE EMPREGO

Se a entidade beneficiaria non vai realizar a busca de candidatas a través da oficina de emprego, senón a través de colaboración con calquera das entidades recollidas no punto 2 do artigo 9 da Orde (CIMS, servizos sociais, etc); unha vez seleccionada a candidata ou candidatas, e previamente á contratación, a entidade beneficiaria procederá a remitir, a través da sede electrónica da Xunta de Galicia (<https://sede.xunta.gal>- Procedemento SI461B), os seus datos á Dirección Xeral para a Loita contra a violencia de Xénero, segundo modelo que figura como Anexo II desta instrución, convenientemente asinado por cada unha das candidatas, aos efectos de comprobar o cumprimento dos requisitos establecidos na Orde de convocatoria. Se non autorizasen a comprobación, xunto co Anexo II deberá achegarse a documentación acreditativa de que as ditas mulleres cumpren os requisitos do artigo 6 da dita orde.

Unha vez comprobados os requisitos das candidatas e con carácter previo a contratación, a entidade achegará á oficina de emprego asignada:

- O anexo da resolución
- Unha listaxe das persoas candidatas a efectos de que a oficina rexistre unha oferta tipo A coa condición especial 01 "víctima de violencia de xénero" e 05 "víctima de violencia sexual". Esta oferta está exenta da obriga da difusión ao ser unha política activa de emprego.

Posteriormente a oficina de emprego deberá vincular nominalmente ás candidatas e facilitar o número da oferta á entidade sen ánimo de lucro.

3.2 SELECCIÓN A TRAVÉS DA OFICINA DE EMPREGO

Cando a entidade beneficiaria opte por realizar a selección mediante buscas na oficina de emprego, dirixirase á oficina asignada, levando, de xeito obrigatorio o anexo da resolución de concesión, no que se incluírán os seguintes datos:

- a. Número de mulleres que van contratar: este número é o que determinará o número de candidatas a remitir que será de unha ata tres candidatas por posto (a elección da entidade); de ser preciso, repetíranse tantas sondaxes e buscas como sexa necesario co límite indicado anteriormente ata que os postos ofertados sexan cubertos.



b. Tipo de persoas participantes do programa: As persoas a seleccionar pertencerán preferentemente ao colectivos identificados no aplicativo SICAS pola condición especial de persoa física cun código 01 "víctima de violencia de xénero" ou 05 "víctima de violencia sexual".

As entidades sen ánimo de lucro beneficiarias tamén poderán seleccionar mulleres que estean inscritas como demandantes de emprego e que acrediten a condición de vítima segundo o artigo 5 da Lei 11/2007, pero que non teñan anotada a condición especial 01 "víctima de violencia de xénero" ou 05 "víctima de violencia sexual" nin teñan interese en tal anotación. Neste suposto, as entidades proporán a vinculación nominal das candidatas sendo a Dirección Xeral de Loita contra a Violencia de Xénero a encargada finalmente da comprobación dos requisitos.

c. Tempo de duración da contratación (mínimo 6 meses).

Procedemento

O procedemento de selección pactarase dende a entidade beneficiaria coa persoa titora de VVX encargada da xestión da oferta da correspondente oficina de emprego, que realizará as actuacións que considere oportunas para concluír con éxito a selección indicada.

A selección realizarase a través dunha oferta tipo A coa condición especial 01 "víctima de violencia de xénero" e/ou 05 "víctima de violencia sexual", se ben as buscas poderán realizarse por sondaxe de oferta, busca parametrizada, sondaxe libre ou vinculación nominal. Por norma xeral, as ofertas realizadas ao abeiro desta instrución non se difundirán pola súa consideración de política activa de emprego, salvo que a oficina o considere necesario.

A entidade poderá optar pola proposta directa de candidatas mediante vinculación nominal á oferta, para o que a entidade beneficiaria propoñerá directamente candidatas á oficina de emprego, aos efectos da correspondente identificación pola oficina de emprego cos códigos específicos que sexan precisos para a mesma.

En resumo, segundo o previsto na Orde do 24 de xullo de 2026, o colectivo a atender e a súa forma de selección autorizada será o seguinte:



COLECTIVO	FORMA DE SELECCIÓN	ACREDITACIÓN
Mulleres coa condición de vítimas de violencia de xénero ou violencia sexual	Oferta tipo A con condición especial 01 e/ ou 05 : sondaxe de oferta/busca parametrizada/sondaxe libre/vinculación nominal	Demanda de emprego (para os casos de non confidencialidade) Titor/a específico da OE nos restantes

Desenvolvemento da selección con busca en oficina de emprego

A oficina de emprego facilitará a entidade beneficiaria a relación de candidatas aos efectos de que esta realice a selección definitiva. No caso de mulleres que teñan establecida na súa demanda a confidencialidade de datos, será o/a titor/a desta quen facilitará a comunicación entre a entidade e a muller VVX/VVS para permitir a selección correspondente.

Unha vez recibida a relación de candidatas, a entidade beneficiaria contactará coas ditas candidatas aos efectos de verificar o seu interese en participar no programa. Transcorridos dez días hábiles dende a dita recepción, a entidade beneficiaria deberá remitir á oficina de emprego unha relación co estado de cada unha das candidatas ("seleccionada" ou "non seleccionada" segundo proceda), segundo o modelo que figura como Anexo I a esta Instrución.

O proceso repetirase no caso de que a entidade solicite novas candidatas.

Finalización da selección:

Unha vez finalizada a selección de candidatas, e previamente á contratación, a entidade beneficiaria remitirá á Dirección Xeral para a Loita contra a Violencia de Xénero (Subdirección Xeral para o Tratamento da Violencia de Xénero), a través da sede electrónica da Xunta de Galicia (Procedemento SI461B), o modelo que figura como Anexo II, convenientemente asinado por cada unha das candidatas, aos efectos de comprobar o cumprimento dos requisitos establecidos na Orde de convocatoria. Se non autorizasen a comprobación, xunto co Anexo II deberá achegarse a documentación administrativa de que as ditas mulleres cumpren os requisitos do artigo 6 da dita orde.

4.- VISTO E PRACE PARA A CONTRATACIÓN:

Feitas todas as comprobacións oportunas, dende a Subdirección Xeral para o Tratamento da Violencia de Xénero indícarase á entidade beneficiaria cales son as candidatas que cumpren os requisitos para que proceda á súa contratación.



Unha vez realizadas as contratacións das candidatas por parte das entidades sen ánimo de lucro beneficiarias, e independentemente da súa forma de selección, a Subdirección Xeral para o Tratamento da Violencia de Xénero da Dirección Xeral para a Loita contra Violencia de Xénero comunicará as ditas contratacións ao Servizo Público de Emprego de Galicia, a través das coordinacións provinciais de VVX, para os efectos de identificalas no aplicativo SICAS.

5.- PROTECCIÓN DE DATOS

Todas as entidades deberán dar cumprimento á normativa de protección de datos persoais, en concreto ao disposto no Regulamento (UE) 2016/679 do Parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais (Regulamento Xeral de Protección de Datos) e demais normativa concordante.

Os datos persoais das persoas usuarias participantes nas actuacións subvencionadas trátaranse pola Dirección Xeral para a Loita contra a Violencia de Xénero na súa condición de responsable, coa finalidade de xestionar o adecuado desenvolvemento desta Orde e poderán ser comunicados ás administracións públicas competentes cando sexa necesario para a tramitación do procedemento. A base lexitimadora do tratamento é a realización dunha misión de interese público e o consentimento das persoas interesadas, que poderán acceder, rectificar e suprimir os seus datos, así como exercitar outros dereitos a través da sede electrónica da Xunta de Galicia ou nos lugares e rexistros establecidos na normativa reguladora do procedemento administrativo común. Contacto delegado de protección de datos e máis información en <https://www.xunta.gal/proteccion-datos-persoais>.

As entidades serán responsables de informar de maneira fidedigna ás destinatarias finais, do tratamento que levarán a cabo sobre os seus datos conforme ao especificado no artigo 13 do Regulamento xeral de protección de datos, así como dos aspectos incluídos no parágrafo anterior, recadando o seu consentimento explícito ao efecto. Así mesmo, as entidades serán responsables de custodiar a documentación que acredite o cumprimento destes deberes.

Santiago de Compostela na data da sinatura electrónica



ANEXO I

SUBVENCÍONS DESTINADAS AO FOMENTO DA CONTRATACIÓN POR PARTE DE ENTIDADES SEN ÁNIMO DE LUCRO DE MULLERES QUE SOFREN VIOLENCIA DE XÉNERO COFINANCIADAS POLO FONDO SOCIAL EUROPEO PLUS NO MARCO DO PROGRAMA FSE+ GALICIA 2021-2027 .

COMUNICACIÓN RESULTADO SELECCIÓN CANDIDATAS

Ao abeiro da Orde do 24 de xullo de 2026 pola que se establecen as bases reguladoras das subvencións destinadas ao fomento da contratación por parte de entidades sen ánimo de lucro de mulleres que sofren violencia de xénero, cofinanciadas pola Unión Europea no marco do Programa FSE+ Galicia 2021-2027, e se procede a súa convocatoria para o ano 2026 con carácter plurianual, a Entidade <DENOMINACION ENTIDADE>, con NIF/CIF<Nº NIF/CIF>, comunica que o resultado da selección de candidatas remitidas por esa oficina de emprego foi o seguinte:

OEX que realiza a sondaxe: /

Número de Oferta: /

RELACIÓN DE CANDIDATAS

Nº	NIF	APELIDOS	NOME	RESULTADO (sinalar o que proceda)	OFICINA DE EMPREGO NA QUE ESTÁ INSCRITA
1				☐ SELECCIONADA ☐ NON SELECCIONADA	
2				☐ SELECCIONADA ☐ NON SELECCIONADA	
3				☐ SELECCIONADA ☐ NON SELECCIONADA	

*Inserir tantas filas como sexa preciso

Lugar e data

Nome e apelidos da persoa responsable da entidade.

Sinatura



ANEXO II

COMUNICACIÓN Á DIRECCIÓN XERAL DE LOITA CONTRA A VIOLENCIA DE XÉNERO DAS CANDIDATA/S SELECCIONADA/S PARA COMPROBACIÓN DO CUMPRIMENTO DE REQUISITOS NA ORDE DE FOMENTO DA CONTRATACIÓN POR PARTE DE ENTIDADES SEN ÁNIMO DE LUCRO

PROCEDEMENTO	CÓDIGO DO PROCEDEMENTO
SUBVENCÍONS DESTINADAS AO FOMENTO DA CONTRATACIÓN POR PARTE DE ENTIDADES SEN ÁNIMO DE LUCRO DE MULLERES VVX	SI461B

Unha vez finalizada a selección de candidatas por calquera dos procedementos establecidos nos apartados **3.1 e 3.2** desta instrución, e previamente á contratación, a entidade beneficiaria remitirá á Dirección Xeral para a Loita contra a Violencia de Xénero (Subdirección xeral para ao Tratamento da Violencia Xénero), a través da sede electrónica da Xunta de Galicia, a relación de candidatas seleccionadas, xunto coa sinatura de cada unha delas, que autorice á comprobación dos datos aos efectos de verificar o cumprimento dos requisitos establecidos na Orde de convocatoria.

Se no autorizasen a comprobación, xunto co anexo II deberá achegarse a documentación acreditativa de que as ditas mulleres cumpren os requisitos do artigo 6 da dita orde.

		As interesadas, mediante a súa sinatura, autorizan á Dirección Xeral para a Loita contra a Violencia de Xénero á comprobación dos seus datos aos efectos de verificar o cumprimento dos requisitos establecidos na Orde de convocatoria que se marcados no cadro correspondente No caso de que as interesadas se opoñan a esta consulta, deberán indicalo no cadro correspondente e achegar unha copia dos documentos acreditativos deles			
NOME E APELIDOS DA/S CANDIDATA/S SELECCIONADA/S	NIF	COMPROBACIÓN DE DATOS		DECLARACIÓN RESPONSABLE	SIGNATURA DA/S CANDIDATAS SELECCIONADAS
		Os seguintes documentos serán obxecto de consulta ás administracións públicas, de ser autorizado pola interesada.			
			OPÓÑOME Á CONSULTA		
		☐ Estar inscrita como demandante de emprego en situación laboral de desemprego ou ocupada no Servizo Público de Emprego de Galicia. ☐ A condición de VVX segundo o artigo 5 Lei 11/2007		☐ Declaro ter cesado a relación de convivencia segundo o disposto no artigo 6.2 da convocatoria.	

Cubrirase un anexo para cada contratación



INFORMACIÓN BÁSICA SOBRE PROTECCIÓN DE DATOS PERSOAIS

Responsable do tratamento	Xunta de Galicia. Consellería de Política Social e Igualdade. Dirección Xeral de Loita contra a Violencia de Xénero.
Finalidades do tratamento	A tramitación administrativa que se derive da xestión deste formulario e a actualización da información e contidos da Carpeta cidadá.
Lexitimación para o tratamento	O cumprimento dunha misión realizada en interese público ou o exercicio de poderes públicos segundo a normativa recollida no formulario, na páxina https://www.xunta.gal/informacion-xeral-proteccion-datos e na ficha do procedemento na Guía de Procedementos e Servizos. Consentimento das persoas interesadas, cando corresponda.
Destinatarios dos datos	As Administracións públicas no exercicio das súas competencias, cando sexa necesario para a tramitación e resolución dos seus procedementos ou para que as persoas interesadas poidan acceder de forma integral á información relativa a unha materia.
Exercicio de dereitos	As persoas interesadas poderán acceder, rectificar e suprimir os seus datos, así como exercitar outros dereitos a través da sede electrónica da Xunta de Galicia ou nos lugares e rexistros establecidos na normativa reguladora do procedemento administrativo común.
Contacto delegado de protección de datos e máis información	https://www.xunta.gal/proteccion-datos-persoais
Actualización normativa: No caso de existir diferentes referencias normativas en materia de protección de datos persoais neste procedemento, prevalecerán en todo caso aquelas relativas ao Regulamento Xeral de Protección de Datos.	

LEXISLACIÓN APLICABLE

Orde do 24 de xullo de 2026 pola que se establecen as bases reguladoras das subvencións destinadas ao fomento da contratación por parte de entidades sen ánimo de lucro de mulleres que sofren violencia de xénero, cofinanciadas pola Unión Europea no marco do Programa FSE+ Galicia 2021-2027, e se procede a súa convocatoria para o ano 2026 con carácter plurianual.

SINATURA DA PERSOA SOLICITANTE OU REPRESENTANTE

Lugar e data					
	,		de		de

